





重刻特科狀元雪磯先生詩集序

雪磯先生宋理宗朝特科狀元春陵人也其後嗣

韶來教戎庠出其所著詩稿及所對策示

為序夫詩言之成章者也必其志之正氣之完學

之粹然後發於言而成章雄渾和暢清新竒古可

以傳之當時垂諸永久觀雪磯先生詩可見矣先

生敷策宋廷有曰求天下之士以文不若泝天下

之士以道曰秉正直之氣節則發忠鯁之言議曰

詞賦不本乎理致日以雕鐫經義不求其指歸曰
以穿鑿此數言者其志之正氣之完學之粹豈不
概可見乎故其聲於詩雄渾而無萎蕩之弊和暢
而無乖疎之失清新而出乎蕪陋竒古而脫乎凡
鄙可謂能詩也已然其自序云蚤歲雕鏤纂組溺
志詞章既而悔之方將鞭辟近裏以進聖賢之學
其敢以詩傳哉則先生涵養之純進脩之篤過人
也遠矣又豈泛泛駕高談騁浮辭者之比乎稿凡百

五十餘篇其在當時友人羅季海胡雪江朱嗣賢
何堯卿輩皆為刻梓世變既遠湮晦寢多第其後
世奕葉簪纓故得以傳之不替也今韶再加編次
故為題首簡使觀者有所徵也先生諱雷發字聲
遠雪磯其號云時正統丙寅五月既望賜進士及
第禮部尚書前翰林院脩撰西川周洪謨序

雪磯叢藁序

僕非能詩者而亦好作詩蚤遊諸老之門或謂可與言詩比歲渝江羅季海西湖胡雪江間亦採而刊之然傳錄失真甚則雜以他人之作以魚目而混驪珠僕得盜名之譏矣其可乎前歲歸自京師繼罹憂患蓋不復言詩也嘗得李抑抄書必欲為之刻梓即嘗謝之繼而友人朱嗣賢何堯卿捐泉市梓又有請焉辭之再四而請益堅余詩本無

可傳而諸賢軫念者如此僕不得辭矣切念蚤歲
雕鏤纂組溺志詞章既而悔之方將鞭撻近裏以
進聖賢之學其敢以詩傳哉古今言詩莫尚於老
杜嘗有詩曰文章一小技於道為未尊僕果能詩
猶犯老杜之戒况不能詩乎知道者當諒僕之心
而有以教之可也時寶祐丁巳朔樂雷發書

雪磯叢藁卷之一

宋寶祐癸丑特科狀元樂雷發撰

後嗣教諭樂韶編

知縣樂武校

歌行

九疑紫霞洞歌

倚歟奇哉紫霞之洞真天開予變萬狀不可述恍
疑幻出壺中之蓬萊湘濱兩妹不敢到悵望蒼梧

雲縹緲爾來三千三百年班龍空卧金光草我採
姹女江華濱是為三十六帝之外臣右持綠玉杖
左携紫金經長歌天上謠一呼開局列炬照溪窈
懸身事幽討群仙喜我來驚笑欲絕倒何侯撫我
頂偉遠拍我肩綠華贈我金條脫安期分我紅景
丹借問此何地指言太虛天翠霞紫雲張寶幄懸
黎結綠盤瓊玲萬壘蒼苔荒石田誰呼青龍耕紫
煙虎穴銅墻未遍識擬開寶藏紉雲緞差我水際

披篔簹翁應是錢鏗釣神龍仙人仙人何多事驚世
駭俗變異靈或跣巨足垂天雲或印短趾流沙潯
或現姑射處子身粉霞紅綬藕絲裙或示普陀大
士形或持簪柳垂寶瓔或插鏤象管或結火齊珍
或琢玄圃玉或布祗園金洞中之深不知幾百里
但見縈紆屈折一里一澗水人言有路通桂林乘
興欲尋日華君吾聞洞中大小洞天三十六帝遣
列真分治局上界宮府應更多定知此洞今誰屬

猗歟奇哉紫霞之洞真天開我上會稽探禹穴復
浮滄海登天台岩谷豈無奇眎此何塵埃摩抄崖
石題惡句記我杖屨敲雲來黃涪翁元漫叟目力
一生空宇宙滄岩陽華有何奇枉費篇章剗石竇

烏：歌

莫。讀書莫讀書惠施五車今何如請君為我焚
却離騷賦我亦為君擘碎太極圖急來相就飲斗
酒聽我仰天呼烏：浚衣大帶講唐虞不如長纓

繫單于吮毫搦管賦子虛不如快鞭躍的盧君不
見前年賊兵破巴渝今年賊兵屠成都風塵瀕洞
兮豺虎塞途殺人如麻兮流血成湖眉山書院嘶
哨馬浣花草堂巢妖狐何人笞中行何人縛可汗
何人丸泥封函谷何人三箭定天山大寇若箕兮
高劍拄頤朝談回軻兮夕講濂伊綬若：兮印纍
纍九州博大兮君今何之有金須碎作僕姑有鐵
須鉗作蒺藜我當贈君以湛盧青萍之劍君當報

我以太乙白鵲之旗好殺賊奴取金印何用區區
章句為死諸葛兮能走仲達非孔子兮孰却萊夷
噫歌烏：兮使我心不怡莫讀書成書癡

寄雪蓬姚使君

贈君昆吾湛盧之寶劍青雀黃龍之巨航懸黎垂
棘之美玉都梁篤耨之名香佳人在何處濯足洞
庭望八荒揭車馱已辟芷綠欲往從之道阻長倚
寶劍兮翼軫膠巨航兮沅湘玉以彰君子潔身之

德香以表騷人流世之芳我所思兮隔秋水天吳
翁忽蛟螭翔佳人佳人塞誰與愛而不見心盡傷

胡院出示車攻圖仍索俚作

九壤卧龍呼不起乳臭談兵空滿耳書生未識玉
帳經且抱此圖究終始姬家出車詠贏家小戎詩
衛家武剛扞突騎馬家偏廂定羗夷只在車陣無
人識天狗橫空曬腥血胡人以鞍馬為家誰遇奔
衝展奇策豫章先生今孔明胷中森羅萬甲兵天

衡地軸妙絕識內陣外陣何縱橫千枝綠沉列虺
虎萬臂黃間張白羽人言險野難用車公獨規模
掩前古車攻圖車攻說八彩眉前曾進轍世人苦
謗陳濤斜却向齊門空鼓瑟今朝朱轡富川頭絕
江以此瞻神州李綱政要講車戰南渡勲業應可
收涇水黃鐵山碎隄輪快展幽燕地朗誦先王復
古篇他時此筆猶能繼

壺中天歌贈侯明父

蓋頭即可居容膝即可安連雲大廈千萬間何如
壺中宇宙寬壺中何所有筆床茶灶葫蘆酒壺中
何所為目送飛鴻揮園絲窓前祝融老僧竹壁上
九疑狂客詩壺中主人知為誰啖棗仙伯雪鶴姿
左攬玄微袂笑移砥柱弄河水右抱長房肩飽食
麟脯傾玉舩蓬萊山在何處勸君且占壺中住不
曾上到金馬門也應不識匡州路採禹穴浮沅湘
脚下塵土鬢上霜我到壺中如故鄉

謝揚孟溪縣丞惠以章墨

白首侯芭蜀江邊曾向君家傳太玄射熊草賦留
殘墨相應當日還渠得飄零蕭洒幾世孫解得膠
法春玄雲物理往來元莫測後世子雲還舊壁君
家所有更贈君君還贈我何慙感君殷勤服三
嘆怒力西窓磨鐵硯太玄艱深吾不為願寫誠齋
易傳探玄機

佳人兩章寄許東溪

衡之山鬱蒼蒼我有佳人在山之陽木難為佩兮
雲錦為裳愛而不見兮我心憂傷安得為鷗鷺凌
風置君傍衡之山鬱蒼蒼以衡之水清且漪我有佳
人在江之湄朝食落蓀兮夕饌江蘺欲往從之兮
我馬虺隤安得為琴高泐波與君隨衡之水清且
漪

古體

登瀛溪太極樓

岑樓跨層崖灌木翳顏治曠哉宇宙心况茲展遐
眺前哲日以遠川麓被文藻芳甸馥荃蘅 雜
鳧鳥亭：治中蓮冉：庭下草扣寂參太極撫化
領衆妙俗薄神理垂力柔聖途杳英：考亭翁反
心會天與萬理繁良言一誠貫元造勗我登樓人
畢景盡此道深根復深根篤行以為寶

送程營道官滿赴任

高旻振爽籟蒼雁鳴芳洲傾城餞茂宰鄉耆羅藻

舟茂宰蘊淵道厥源沂伊流字昉振仁策範俗悖
聖猷夷心灼理要政簡吏統周芳風被儒肄惠術
淪農疇魯封有馴翟張廷無訟牛慨茲戒徂兩離
衷鬱綢繆贈我茂科蓮紉君晏子裘慶霄際鳳躍
神面瞻麟遊世道日以隘民瘼誰克瘳厲志抗遐
業吹萬溥九州揆余忝皇鑒敷文勉征愁行：重
行：夷康無駐舟

次韵李監丞月夕閣雨

種桂早欲稿蒺藜秋向榮哲匠軫民瘵慨此夜魄
明蓐收心揪斂肥遺何縱橫仰霄際蟾曜聆埴佇
鶴鳴彼美玩華光芳罇酌蘭生崇榭歌窈窕秀質
羅輜軒節序孰不歡宅生念匪輕同胞正對
酒何忍傾恤喜限昏智同茲感陰晴淦山雲起
策之林颺驚企彼天飄潤弭此農耨聲崇情發翰
墨賞心謝籌觥溥澤乃風念宰爵豈所營榮賤有
異分感茲及岩耕

次韵李監丞城西紀遊

叫舜問稟濶詠漁滌塵囂駕言城西遊慨彼往昔
遙儀鳳不可呼駕鵝浴清瀟懷或光風香蕙若吹
涼颺蒼梧隴雲愁匡廬阜太雕豈無人希周亦有
文規姚佔畢末學陋俗薄神理銷沿流浮伊洛沂
源窺羲堯執中與太極萬市瞻魁杓察微篤強力
賢聖諫匪遼舜宮翳灌木濶塾棲叢苔觀乎紀遊
作悟彼進學條蘭卮娛才彥豈謂磊砢澆得深清

賞愜理勝英藻超揆予果何為農野勤畊穡景迫
味見道曷奉德化招

次韵李監丞同劉玉淵遊七泉

世變如流水前哲嗟逝川良牧隆化本訪古漫叟
泉念茲名泉意感彼末俗偏淵竇與嵌臼杖屨聊
回旋不識漫叟心曷誦漫叟篇惻念軫蒼氓溥澤
同一天蟻聚與羔跪命義當益堅回邪乃敗德毋
以已欲專夸士五鼎辱宰爵或自鑄臨流嘆澆風

薄言傾酒舩浸泉旗吾志東泉存舊傳惠忠孝汙
渚銘石昭萬年無感發人黜指猷墨氈歲月亦
云久古跡埋塵煙泉根石以泐泉上樹欲仙森戟
呵席士誰能聽潺湲理義著古今貴賤俱荒阡今
公七泉遊陵谷尚未遷勵俗振古道及茲誦惡圓
劉侯同襟期賡唱揮彩椽漫叟或有知騎鯨躍層
淵彼哉賊君父圓曲工求權厲民恣屠斮巧宦勒
攀緣安得激七泉布作化雨宣

送綱齋李監丞赴湖南提舉

吏統久已紊使選匪易為蝟虺何秦之鴻雁何累
纍持節豈不多曠職苟所私緬懷紫陽翁昔使東
浙湄陳臬糾官邪揚仁蕪民疲茲道有先後哲儒
昭令規綱齋宅瀟牧邦懋灼帝知厲庶肅案察反
稅驩鄉者所學蘊淵道寬嚴推理宜茲總全楚境
歌此皇華詩位窮民言邈壤廣吏蠹滋問俗職所
重簡僚乃改基視聽貴遠周細微在可遺攬轡戒

前路豈為好爵縻揆予忝英盼懷德念別離別離
果何念康濟乃所期懿茲遠大業肇此咨度時昂
我振英采慰我湘民思

秋夜感懷

溽露沾灌莽華月流高旻吟嘯嘉此夜撫化悲蕭
辰蕭辰何所悲遊子多苦辛道峻壯力謝業遙昌
志湮玄鬚日以變豐景將遂淪堪輿一大宅義娥
為旅人卉木互榮落蛩蟀何吟呻氣隨推耄變理

勝卹喜均反性樂天爵測化葆道真撫卷慨往昔
芳猷懇難親

雪磯詩集卷一終

雪磯叢藁卷之二

宋寶祐癸丑特科狀元樂雷發 撰

後嗣教諭樂韶 編

知縣樂武 校

律詩

寄雪蓬姚使君

湘鱗六：寄相思疎柳新蟬相別時今夜各聽三
楚鴈秋風又老一年詩梅花且補離騷闕意政應

王血 錫生

為史筆知剪竹疑峯新製笛待衝霜月訪桓伊使
時寓
衡陽

謁山齋先生易尚書

淳熙人物到嘉熙聽說山齋亦白髭文字盡傳融
水後精神如戰辟雍時靈椿終不爭朝菌著草惟
堪養壽龜細嚼梅花香總義只應姬老是相知

送桂帥鍾尚書赴召

老依牙纛撫吟鬚又折梅花話別思五嶺不遮鳶

鳳詔四方供誦鮪鱗詩人才真魏凋零後國事江
淮控僣時賴有老臣經濟在快呼桂醕餞篙師

題鍾尚書北征詩稿

野雉江鷗滿都故秋風永黍然吟鬚六千里外驅
旃旆五十篇中見版圖金鉉尚期扶日御玉衡終
合正天衢書生亦有中原志那得君王文二爻

呈廣西張提刑

陸續城邊按部歸梅花隨處撲征駢溪山有助吟

題編獄市無冤訟牒稀竹屋聽猿眠碎月莎庭引
雀步斜暉莫嫌瘴霧侵湘客滿路風霜冷泉衣

合曰天罪言
稔殺瀟濱蟻虱臣亂山斜照獨含情人才不似深
衣古國勢何如楮幣輕石燕未蘓湘國早木牛那
濟蜀州兵幸無杜老流離苦切莫吟詩到北征

間居自遣

雨漬桑樞長昔邪誰能載酒訪揚家漢庭用少臣

今老魯俗皆冠我獨墜憂國苦無蠲忿草看書喜
對決明花衰顏懶作江湖夢擬劖三桮養鬢華

許由溪上小層蘓紅樹蒼山對一矐白髮功名惟
劍在青燈活計併錐無誰言荆楚多奇士却笑乾
坤一腐儒桐帽貂冠供有分寄言兒輩莫揶揄

寄樓居朱漕

住近江心古寺邊幅巾應伴浙僧閒官衙自管金

陵觀冠業多依雁宕山出處要留青史看功名且
逐白雲還殷勤為祝樓居月好照橫舟激碧灣

中一商呈姚雪蓬使君

祝融應自勝崆峒且讀通書辨聖功事可語人甘
受謗詩能名世不嫌窮春邊採葉收湘芒月下調
絃送楚鴻賴有行人碑尚在棠陰依舊戀東風

樓六師雪蓬見示送趙東巖災部詩

皇華歌徹酒杯忙濟畔騷翁送范滂琴帶衡雲絃

索潤馬食湘菹轡絲香山中狸豹隨吟旆部內豺
狼入按章却笑詩寒吟骨聳聽看訓唱挾風霜

書蕭千岳集

向來陽陸共崢嶸吟到停雲趣轉精古似洞庭張
雅樂嚴如即墨劍殘兵茵陳終不肥方朔菜苜何
堪病再耕細讀殘篇搔白首未應造物忌詩名

滕王閣下賦

越柳蜀艇亂相偎風飽千帆帶雨開閣上鳴鸞今

已往江頭孤鷺只堪哀
柳汀絮滿河豚賤
桃塢花殘石首來
應接溪山吾不暇
自憐白首欠詩才

宿金灘

瀧吏崖翁是賞音
江流泯泯對秋吟
天蝦撲火帆搖晚
水狗捎魚島峙深
千里庭闈雲滿眼
十年湖海雁驚心
今宵客枕清如水
稱讀西山夜氣箴

寄許介之

惹得詩名徧九州
酒徒綦伴半公侯
離騷甘隱魚

鱗屋樂府多傳鶴鵲樓
醉葉幾窠歲菊徑
蠹荷三畝護漁舟
中原應有樓蘭國
空鎖吳鉤到白頭

聞邊報寄姚雪蓬

淮烽蜀燧照邊隅
白髮憂時我腐儒
楚客汀洲舉杜若
齊王沮澤索菰葫
耽吟自愛南遊好
久謫曾謀百事無
擬對祝融捫虱話
何時重捋使君鬚

寄戴石屏

曾到元郎吟處吟
雪蓬煙艇欠相尋
鳳鳴道國空

詩句雁到衡峯只信音拾橡祠邊寒聽雨紉蘭院
裡夜分衾塞驢倘遠黃花約鴉背敲煙共拙參石
屏訪雪蓬
於衡陽

戊戌冬僕客桂林雪中趙升愚司理書張
思業逢賈島絕句為寄今冬對雪感而有

作

朔風桂水浸瓊沙曾共騷翁理釣槎對酒有吟端
木葉論詩還憶款冬花飢能驅我瓶儲罄老不饒

人鏡影華擬喚扁舟尋剡叟嶺梅蕭菊各天涯

寄仙巢先生鍾尚書

吹香亭上送飛鴻且把行藏寄蜀桐老境只須尋
遠志世途還要避沙虫於天地初何憾道在丘
園固未窮曾是轅門投卷客應憐聽雪卧隆窮

寄蕭太山兄弟

梅花好處共心期曾擷天葩寄夢思兄弟自為千
古計江湖方誦二蕭詩貪泉定喜逢廉吏倭國何

應拜老師蕭穎士事騰擬尋君攀桂樹路遙誰肯借驢
騎蕭君見予有梅花且補離騷闕之句為之擊節
雖未相識蒙書二十首為寄故首句及之

送丁少卿自桂帥移鎮西蜀

瓊海收兵玉帳閑又移齋艦沂浯灣三邊形勢全
憑蜀四路對疆半是山魏將舊聞侵劍閣漢兵今
欲奉函關時會有三細傾瑞露論西事想在元戎
指畫間

詔家洲

竹塢松壑編履痕斷碑無首野苔昏江山應識前
賢事裴柳今存幾世孫島霧海霞留古意春猿秋
宿冷騷魂何人會得登臨意閑嚼梅花伴酒樽

慈氏閣

崢嶸梵閣礙銀潢且對畦衣問馬王落日斷霞連
楚粵缺鐘壞像雜梁唐英豪已往雄圖歇棟宇猶
存古意荒惆悵石湖題柱在倚欄無句獨淒涼

雉山寺宋永初中有僧西顛誦法華經於

此白雉聽之而化至唐黃梅五祖弟子喜
登告祖乞巡禮五祖應以遇雉即心後至

蘇碑蘿石擁岳肩獨倚筇枝問大乘白雉苦無千
歲種青山空識六朝僧詩傳北岳刊新帖禪接西
淮冷舊燈擬鑿水泓澆凍硯禊亭閑借法華騰

擬遊長沙至零陵忽動歸興

擬尋禹柏過長沙且薄愚溪問酒家歲早可能飛

石燕秋高還看落天蝦乾坤納催霜髮歧路悠
悠又菊花惆悵草黃騏驎病歸心依舊烟霞逸

袁家碣泊舟

往事誰能問水濱停撓仍是薄西曛樵漁空自存
袁姓鳧雁何應識柳文釣艇分燈歸客艇嶺雲拖
雨接溪雲攬楠蘭並今何在空使行人誤舊聞

江遠衡門接旅津鯉魚風歇水粼粼湘醜三盞澆

吟思瀟碧千竿對老身
題壁未能行客醉
典琴不用主人負
隔江誰掉高名麗
滿載鸕鷀捉錦鱗

雨對寒 餞雲壑唐使君赴邕州

蕙勞竹畔擁雙旌
回首江離隔楚汀
魯向前賢叅學問
且教遠俗識儀刑
安南兵息塞烽冷
羅殿馬來蠻草青
悵望鈴齋何處是
遙瞻朱雀認詩星

歸侍

石田茅屋野苔春
喜對庭闈話苦辛
客路今無如

意事瘴鄉難有却回身
且尋農耒耕湘雨
待看天戈洗韃塵
門外黃旗邊餉急
可堪杯酒各傷神

寄吳茂遠

蘇公堤畔繫吟驢
知在垂楊第幾株
學校文章如畫餅
朝廷官爵似呼盧
春吟應欠梅花在
時事曾言楮幣無
惆悵湘湄分袂處
今看細雨長蘼蕪

送史主簿之鄂渚就辟

囊中秋卷逼唐賢
門外侯芭問太玄
才大豈堪棲

枳棘官清應只友蘭荃湘行又泛君山月淮績魯
衝赤壁烟擬借從君新句看試尋黃絹寄網舩

宦途捷徑在三邊且駐吟舫贈馬鞭壯士苦無橫
草志將軍還用撒花錢兵猶未回燕鴨蜀耗何
應問杜鵑今日送君無別話看隨卻穀洗狼烟

送邵瓜坡試湖南漕舉

槐花西路促湘行閩賦唐詩舊擅毅有志尚曾言

國事論心何止在科名畢方夜煽抗都火大角秋
纏蜀道兵莫作腐儒場屋話琅玕滿腹心須呈

送李公裕遊臨武

嶺梅蕭菊兩關情歲晚江湖載酒行客路欲依巖
挺子瘴鄉已老少遊兄瓦盃且話田家事肉食誰
通鈍漢名惆悵韜張亭畔路雪鞭風帽又東征

贈江華尉熊伯巖

堂萱營柳伴吟哦黃綬仙翁鬢未皤對客不矜名

第貴論心惟在簡編多江頭魴鯉香晨膳境內鷓
臬冷夜窠湘國詩盟今竄莫衰顏猶喜識陰何謂陰

鏗何
遜也

江華送熊清父遊廣州時予亦有衡陽之

役

邂逅陽華且酒壺海鵬衡雁各征途閑身俱被飢
寒役老境還看離別無鄉夢定應思款段客吟何
用說媿隅曾從仙叟叅玄訣好訪安期採澗蒲

喜李景魏就熊伯巖縣尉招

長歌白石草廬深今抱園絲就賞音温飽不為兒
輩計行藏端見古人心鱸魚堂上春開帳鷄鶩灘
前夜對衾擬掛奚囊梅下聽誦仙應共隱仙吟

送友人之辰州覲省

路窮巢畔瘴雲低山徑如梯去馬遲正則自吟皇
樹頌廣微惟誦白華詩春風採藥桃花國落日尋
碑蕙苾祠覓得丹砂能寄否溪亭送客鬢毛衰

雪硯詩集卷二終

雪磯叢豪卷之三

宋寶祐癸丑特科狀元樂雷發撰

後嗣教諭樂韶編

知縣樂武校

律詩

謁李梅亭

力拔鯨牙氣貫虹
玉堂歸只守文窮
世無真魏扶
吾道人以乾淳望
此翁大地精靈浮
筆下國家命

脉寄山中緼袍羸馬崇仁路正擬登門聽繫蒙

代送徐侍郎赴召

大厦誰堪任棟梁試留齋艦問行歲朝廷議論如
春雨吳蜀人才似夕陽三漸向魯投砭劑五寒今
望起膏肓擬看相業磨崖在却到浯溪話別觴

聽友人談蜀道事

石棧天梯蕩戰塵誰驅哨馬滿岷岷盡看烏犬為
君子元次山誰問沙虫化小人韃智豈應強兀术

蜀才正自欠吳璘細吟猛虎長蛇句空對西風瀟

瀟中

送廣州劉泚治倅欽州兼守事

天涯亭畔擁提屏丹荔黃蕉滿去程皂蓋却迎新
別駕碧幢應憶老先生象蹄印雨歸蠻國鯨鬣掀
潮撼海城曾是鄉賢分守處試尋醉石共題名

詔入曾
守欽

暮雲春逢熊季可

暮雲春樹飽相思今共秋風捋白髭北關未知鸚
鵡賦南州空誦鷓鴣詩旗亭尚喜髡能飲客路誰
知朔獨飢賴有湘翁生計在且吟九辨擷江蘼

送李煥云赴恭城主簿

恭城山水接三湘應覺他鄉似故鄉官况不妨棲
枳棘客程還見食檳榔寒暄未定宜加愛事業無
窮要自強千古忠魂如可問試 離井漱吟腸

寄李伯揮

石樓峯下寄吟身靜掩桑樞琢楚珍蘋草青莎招
隱士莫雲春樹憶詩人門無車馬多嫌僻家有圖
書不似貧擬借大鵬措老眼何時樽酒得相親

舜祠送桂林友人

堯山分首舜山逢呼酒旗亭兩鬢蓬客思且須論
契濶詩交應不計窮通見曹富貴秋烟外前輩風
流落葉中明日吟舫又何處渡江衣冷荻花風

送董炎震歸攸縣

千菊溪頭話別情君行我任兩伶俜
山中有酒招元亮石上無禾養百齡
狼尾屋低苔漠漠龍鬚菜龍鬚菜有故鄉語燕應堪聽莫放扁舟過
長水冷收縣有洞庭

贈衡山侯霖

家住衡山茗塢深軒轅道士是知音
宸樽好酒聊同醉石鼎詩難莫浪吟
雨外虺隤寒食路花邊格磔故鄉心
却憐世上揚雄少腸斷侯芭何處尋

送駱起謁襄帥廣西憲

知君無地種江離看了衡山看九疑
客路不堪還話別侯門何處可題詩
吟竒羅帶行離岸唱白銅鞮過習池
呼酒試澆征馬足繡臺油幕有相知

中翁題豫章宋德父遊湘詩卷

醉呼仙叟共浮湘細載風烟滿錦囊
名是浦雲山雨起詩連沅芷澧蘭香
好吟秋月船元結莫賦朝雲惱楚襄
英巨老仙今寂莫行人還解識珩璜德父

到春陵即有
詩弔曾景建

常寧道中懷許介之

雨過池塘路未乾
人家桑柘帶春寒
野巫豎石為神像
稚子搓泥作藥丸
柳下兩妹爭餉路
花邊一天吠征鞍
行吟不得東溪聽
借硯村廬自寫看

題許介之譽聞堂

端平丙申桂林伯尚書鍾公以遺逸薦

東溪先生許侯於朝越明年得旨補初

品官衡州戶曹掾其誥詞於始則有夙

有譽處且嫺文辭之褒於終則有其以

行義教於鄉里之勉州里人云莫不榮

之及明年許侯乃于東溪之濱創堂五

間以為講道著書之地仍摘天語譽文

二字以張其名敬上賜也堂成山齋先

生為之記者詳矣當世之名卿才大夫

人為之賦咏者衆矣顧僕晚生小子何

足言詩辱微理作不敢固以陋辭敬書
二首以紀盛事併敘聖天子始終褒勉
之意庶得附姓名于不朽云
曾佐元戎洗綠林此翁何止擅詩轂
久辭羈騎尋瓢飲誰引鳴騶聒耦耕
厚禮正羅溫處士浮名還汙耻
先生衡茅那識絲綸美尚擬升堂結社盟

又

姜夔劉過竟何為空向南湖老布衣
造物忌名徒

古有詩人得位似君稀聖朝自要求
參朮吾道何應賤葳蕤
晚節黃花須愛護且教湘士挹芳菲

濂溪書院弔魯景建

太極樓頭宵月寒斷絃綠綺不堪彈
窓前自長濂溪草澤畔還枯正則蘭
蒼野騷魂惟我弔烏臺詩案情誰刊
傷心空有金陵集留向江湖洒淚看

許介之以丞相周益公所為古樂府四篇

見寄敬題其後黃閣

紙上珊瑚間木難曾敲黃閣却吟鞍賞音今有平
園否得句堪尋响嘯刊鸚鵡夜棲金屋冷的盧秋
戰玉關寒春風歸雁那知已寄與深閨絕塞看

讀繫年錄紹興八年以後事

婁敬金繒滿去輒便看雷雨潤遐陬諸賢自抗排
雲議宰相方深偃月謀湘國乍聞悲鵬鳥秣陵遠
唱聽符鳩九原晏老今知否搔首青編恨未休

揅攔吳大帝廟

赤壁濡須事已虛且依揅攔酌芳壺九原尚擬吞
銅雀子載今惟記赤烏湘浦有人脩舊祀荊州無
地展雄圖定知斫案英靈在閑對祠前洗湛盧

昭陵渡馬援伏波廟

功名要結後人知馬革何妨死裏屍漢帝何能疑
薏苡湘民却解薦江籬紙錢撩亂巫分胙粉壁闌
斑客寫詩墮水沾鴛無處問灘頭斜照曬鸕鷀

訪蕭太山父子

仙桂靈椿各典刑飄々姿韻激天鯨家傳八葉塩
梅種詩接三蘇父子名四海盡將看縣譜一堂那
許與文盟塵埃不敢相親炙且汲渝溪濯客纓

謁張兵部時守臨江新除河南倉

東皇太乙待新詩共喜星槎泝楚涯父老盡將看
鸞鷲使臣應不問狐狸江頭芳杜催行色境內甘
棠有去思細讀詔書搔短髮辨香那識帝王師

蘇瑩中先往新淦過新喻訪之不過賦詩

為寄

玉筍山前水拍空知君何處繫吟蓬敢輕奇士題
九鳥謾有憂心詠阜螽沅芷澧蘭猶可寄江雲渭
樹苦難同門前草木皆詩卷獨倚筇管嘯曉風

送蕭太山赴新興令

翡翠芙蓉去路荒許渾詩裡認封疆昔聞古佛傳
宗印今得吟仙綰縣章魚婢蟬奴供俎豆馬人龍
戶雜耕桑澹翁應解知心事試及寒泉薦辨香

訪菊花山人沈莊可

網盡珊瑚盡採珠只餐秋菊養詩臞
永嘉同社毅名在乾道遺民行輩孤
我恨朱門無食客君言青吏有窮儒
飢寒正用昌吾道且對鈴岡共撚鬚

懷二蕭

未曾相見已相知楚粵江山隸夢詩
每乾坤催我老却於湖海識君遲
機雲才藻今無幾管鮑襟期說向誰
靡亂山嘶瘦馬碧雲日暮正相思

踈拙

越寇齊瑟事皆非踈拙惟甘與世違
客路鶯花愁裡看故山烟雨夢中歸
采薇有備淮南靜移粟無謀浙右飢
納乾坤湏俊傑湘翁只合製荷衣

陳東甫酒間舉作歸心只有杜鵑知之句
猶未成篇因為續之

歸心只有杜鵑知且倚裴亭共撚髭
客路秋風吹

杜若故園春雨老辛夷

陳君撫州人

家貧未辦閒居賦

世濁空吟感寓詩
邂逅江湖還別去
岸花檣燕兩堪悲

贈別陳東甫呈尚書鍾公

洞庭濯足共題詩
令聽驪駒話別離
泣玉可能悲
卞子買金只合鑄
鍾期荷盤剪綠湏
棲鷺：頂分
絲補接羅斗酒
羸肩聊自壯
古來騷客例寒飢

登潭州懷雪蓬姚使君

賈井裴亭編短筇
紅塵歸騎又忽忽
我尋桂樹吟

招隱君對蓮花誦
易通今日江山勞
別夢他年燈
火課新功濂溪
寂念初卒老恨
聽連床話未終

下攝市

吟到湘潭一葉黃
賈湖踪跡正悲涼
抱琴沽酒異
鄉客打鼓發舩
何郡郎楚女越
商相雜沓淮
鹽浙楮自低昂
塵埃市井無人
識濯足江頭
望八荒

雲峯寺

擬尋岫嶽看蟠螭
且解青鞋濯禹
溪帛古猶疑九

技拍談禪且問一茱糝席孤崖樹供僧爨猿摸廊
碑認客題應接溪山無好句滿林空羨亂蟬嘶

到衡岳呈茅山長

閒依禹柏繫征駝猿鳥應猶怪賤踪已礙開雲訪
韓愈可能避雨識茅容朱陵洞裡秋呼霍戴蓋峯
前曉聽鐘欲踏青霞尋勝趣倦遊應許借吟筇

許介之館僕於東溪發贈別

洗耳泉頭漱晚涼西風衣袂水花香酒邊豪興遊

荆楚燈下清談雜晉唐天地每窮真俊傑山林偏
有好文章試拈茹草同君舞後夜聞雞月滿床

下第歸後李伯輝李景魏索近詩

吟遍吳頭楚尾春多慙才客問征塵振衣天日尋
黃獨濯足湘江咏白蘋宋五已慚稱進士陳三何
用作詩人錦囊元屬君家有今買漁經理釣綸

題李湛溪詩集後

楚砧岷葛飽清遊金節銀魚照幾州詩句多如姚

少監行程還似杜參謀黃陵夜誦虞妃泣白帝春
吟杜宇愁凝問端溪何處是夢隨 國弄漁舟

贈李伯輝家譜詩

盪寇將軍後唐朝李卻家綠華雙薦者况復古今
誇

雪礮叢豪卷三終

雪礮叢豪卷之四

宋寶祐癸丑特科狀元樂雷發 撰

後嗣教諭樂韶 編

知縣樂武 校

七言絕句

咏史六首

高祖

逝驢走鹿各消磨劍外功臣剩幾多四皓兩生元

不聽故鄉枉費大風歌

陳勝吳廣

假號偷名只可憐枉拋錢鏹弄戈鉞隴頭燕雀應
相笑鴻鵠元來是項燕

韓信

愁看鐘室劈良弓何不當時殺蒯通今日真王成
底事只應娥媼是英雄

東方朔

蜥蜴盆邊解滑稽且分社肉飽蛾眉劉郎最怕秋
風冷那聽君王換殿帷

司馬相如

狗監無端薦薄情鸛裘犢鼻帝鄉塵當時最有文
君恨不識長門買賦人

班固

清室冤魂叫不聞神丘隆碣謾遺文孑生詞藻誰
知己腐鼠孤雛却悞君

汴堤柳

萬縷春風宰汴堤錦鷓何處柳空垂
流鶯應有兒孫在問著隋朝總不知

讀李群玉集

光順門前繫馬吟弘文館裡翠雲春
却憐白首河西尉枉作蓬萊獻賦人

又

捐珮江頭弄釣舟蘭花杜若滿芳洲
如何才子無

騷思只詠薔薇與石榴

與復古外讀橫渠正蒙書

惆悵枯枝與晬盤雲橫太白夢魂寒
半生驕吝如蝸縮自把西銘反覆看

又

誰駟山起老師竹林燈火共心期
年來後學輕前輩看徹臯比罷講時

題揚從行湘詩卷

揚即誠齋

仙雲寒瑣碧瑤天
突兀吟壇北斗邊
試問鳳皇誰得髓
竹林聽雪對床眠

又

叫雲吹玉舜祠邊
醉嚼瓊糜漱石泉
舊讀離騷今忘却
快披秋卷嗅蘭荃

次韻熊雲瀑秋夜見寄

吟落秋窓燭池紅
想彈九辨入絲桐
荃蘅豈不如
葵菽誰繼幽風補楚風

無題

大裙褰衣走浙淮
何人不識霍山來
只今心印誰傳得
自摺通書撥篆灰

撫州偶題

金柅亭邊柳拂城
春風繫馬酒家吟
塵埃滿面無人識
却得黃鸝作賞音

萍鄉病渴

天子無從典駟荒
村忍渴望瀟湘
楚王萍實甜

如蜜不許詩人取次嘗

甲午社日客桂林

危酒豚蹄客裡歡
石尤風緊奈衣單
東陽病骨如鸚鵡
最怯南州社日寒

桂林歲晚憶鍾尚書

塵滿湘翁薜荔衣
江湖歲晚髮成絲
桂州揚五今何處
雪片梅花枉費詩

醉中偶成

醉敲茶臼嘯秋烟
苦欠高陽買酒錢
擬入亂山餐柏葉
石床閒對麝香眠

送友人遊昭州呈陳謙之僉判

閩山去補荔枝譜
梅谷歸呈飛鷺秋
惟有瓜坡共君在
馬蹄何苦又昭州

又

道鄉牽損袞龍衣
謫墮天涯詠楚辭
莫策蹇驢遊別處
拾青閣下有殘碑

又

鵬運堂前話別愁
治舊三度楚江秋
近懷莫向元
龍道問舍求田是頭

夏日偶書

螺贏銜蟲入破窓
枕書一榻竹方床
家童偶見草
頭字誤認離騷是藥方

秋日行村路

兒童籬落帶斜陽
豆莢薑芽社酒香
一路稻花誰

是主紅蜻蜓伴綠螳螂

新淦偶成

飛：綠鳳掛梅梢
猶記來時雪擁袍
今日歸舟新
淦路黃頭稚子賣櫻桃

贈吳季詩

燕子樓頭一曲春
曾騎驕馬擲黃金
如今世事漫
頭雪破屋孤燈忍凍吟

演教寺吊樓居朱漕

羅帶江頭蛻繡衣人歸香草謝家池
祇今玉樹埋何處惆悵僧房認得詩

又

穿塚難酬地下知逢人多說項斯詩
今朝痛洒西州淚萬里梅花欲放時

延真道院

滄流翠竹接仙局靈菜丹虬供上真
擬就玄翁分半榻閒聽秋雨守庚申

訪趙愚齋不遇謁者云入幕抵晚方歸因成一絕寄奉

雪片梅花滿硯池芙蓉幕裡客歸遲
今朝解了公家事儘聽轅門報酉時

愚齋舊有詩云無曹度日真堪愧又聽轅門報酉時

史主簿以授菴習彙見示敬題其後併寄

張宗瑞

姜夔荒塚白蘋深鷺鷥無聲結綠沉
擬向鄱陽尋後社只招張叟聽君吟

又

吟了南樓到庫樓
塞雲邊月困雕鏤
只今南北無詩禁
曾有新編過韃否

術士醴陵丁夢營
將之春陵有贈

看盡槐花買
人容樽且認舊碑文
只今世上無清惠
却恐元郎解君

又

涿水池邊舊釣磯
何時歸去濯征衣
千年城郭應

無恙祇怕風塵老
令威

送歐陽平仲起鬱林教官

快把詩書洗瘴茆
雕題墨齒盡同袍
天涯那得隨衿佩
試借叔堂講義抄

又

古來節婦比忠臣
怡悵明珠一窖塵
千古綱常君記取
題詩煩問墜樓人

萍鄉和王堯章韻

征衲無人補舊綿
蕭條客枕楚萍邊
撥殘石炭西
窓冷却憶山家楫
柵烟

道書二絕

趙司法詩集自題近道蓋取工部所貽

九隱居詩中語也

和遍陶翁飲酒詩
醉籠天地入鳩夷
細看官爵成
何物肯帶奚囊過
九疑

又

浣花騷伯杳難
世上寧無元隱居
讀罷君詩三
嘆息斷絃綠綺定何如

聽廬山胡道士彈離騷

廬山道士菊潭仙
前世滄浪握楚荃
莫道離騷遺
響絕孤鈎寡珥尚能傳

又

弔湘誰解薦江蘿
忠憤冷寫七絲愁
絕九疑山下
聽重華應許就陳辭

題王堯章佇香亭

滿池蜀錦照深衣
盡日憑欄課楚辭
要識此花香
絕處露涼風細
雨晴時

又

對花味道興何長
好學顏家到坐忘
莫與紅塵見
輩道心清正
自得真香

又

故園荷屋傍瀟溪
苦愛蓮花入夢思
今日題詩還

自咲江湖塵土鬢成絲

題昭州田廷亮書橐後

換柳口裡吐參苓
折檻無門九虎深
家在道鄉亭
畔住定應千古
有知音

又

少海無波霍禁虛
滿朝閉口養曹鯨
白袍烏帽和
寧外却有山人請
建儲

次韻熊雲瀑秋夜見寄

叫徹蒼梧望八荒暮雲秋客各淒涼此情未許傍
人會愁絕中庭月一方

雪磯詩集卷四終

雪磯叢藁卷之五

宋寶祐癸丑特科狀元樂雷發撰

後嗣教諭樂韶編

知縣樂武校

五言律詩

訪伯父幽居

對坐如禪舍閑燒石乳香書看新講義藥問未傳
方僕語梅花裡僧經竹案傍題詩吾豈敢臆戶半

吟章

桂林懷李景魏

陽華萬疊雲無計得相尋
所學皆時好何人知爾
心莎城百粵遠雪嶠一翁吟
已是懷人極天寒祭
水深

桂林送人之瓊州招捕海寇

嘗家洲畔路別爾苦匆
說戰令人喜耽吟與我
同旌旗楓鬼雨舟楫鯨
鱗風想到瓊峰頂題詩更

記功

與李盤翁知縣登七里山吊石道士

疊嶂矗空青耽竒共一尋
苔荒碑意古茗苦道情
深有興梯蒼壁無才詠
玉簪吟仙何處去我輩復
登臨

次韻史主簿雨夜見寄

水長許由溪春寒入竹扉
幾人聽夜雨惟我怯單
衣樹罅青燈耿籬根白
菌肥明朝有忙事推枕問

漁磯

道中逢老儒遊蜀出

丙穴魚應好曾經問釣磯
干戈今未定城郭是耶
非詩社尊黃髮侯門薄布衣
乾坤豺虎滿見尔一
歎歎

時事

時事如顏屋誰堪任棟梁
國貧僧牒賤邊病檄書
忙有分憂宗社無才出舉場
未應王謝輩揮淚送

斜陽

逃戶

租帖名猶在何人納稅錢
燒侵無主墓地占沒官
田邊國干戈滿蠻州瘴癘偏
不知攜老稚何處就
豐年

登江華寒亭

到此脚根酸千峰迴不看
年深碑字淺日薄樹陰
寒石罅巢蜂乳離根隨鳥殘
愛吟還畏險不敢倚

闌干

訪表叔李竹齋

門庭接豆根吟避市塵喧每愛詩無敵應知學有源
雲山供俎豆筆硯長兒孫愧我相過數秋風酒一尊

儼長沙訪雪蓬姚使君至永而返賦此為

寄

今傍南軒任應知理趣精通書多似易論語不言

誠儼欲聽微論猶能慰別情江湖風浪隔腸斷楚鴻聲

雨夜陸放翁集

爐冷童吹火山房夜黯然濕薪添爇熱若茗帶芎煎
燈暗瀟江雨詩吟笠澤煙老仙何處去搔首弔塵編

送黃天河

天河那可到山頂翠叅差村屋剪黃蠟官爐照荔

枝地蠻遊宦少縣小近賓遲鼻祖曾吟處荒苔想
滿碑

呈趙叔愚司理

門戶垂楊句江湖半世看不應求五嶺却自建孤
壇浙社朋遊盡唐詩氣味寒今朝流水譜只向子
期彈

夢訪劉漫塘曾雪巢二先生

前輩風流歇江湖欠賞音向期行古道誰解識余

心月浸吟壇冷雲歸玉筍深瀟湘風雨夜空得夢
相尋

青湘逢廷對人歸因問時事

南客帝鄉歸青袍照綠髭問知當世事解誦聖君
詩淮濁軍書急湘深邸報遲空傳廷試策韋布說
邊陲

南林寺

律院僧應俗庭荒草未刪無碑堪考古有客自看

山竹好惟嫌密雲多不自閑小溪知最近童子夜
方還

象石銘 有序

九疑之麓為麗山有岩明通厥石如象
予遊而愛之遂命之名而銘曰

百獸出王象實孔偉有崩斯石惟象是似巔其

形巉其齒我愛斯岩原象之美鍾 南邈爾

荒服弓帝車維天子使相彼函阿濟多士

教篤學峻 實地任重致遠伊國之器地以人彰

敢銘岩趾

雪磯叢藁跋

愚聞之太上立德其次立功其次立言是謂不朽
夫德蘊諸身心功成於事業言見於著述有內外
相須體用合一之道焉今岐而言之豈有脩諸身
不見諸事施于事不見諸言者乎要之人各有長
而兼盡為難其有得於是者誠君子之異於人能
不朽而存者也足以語此者其惟我鼻祖雪磯先
生乎先生之于有宋叔季方五星聚奎開一代文

明之運也當時科目得人若呂蒙正之雅量王曾
之持正韓琦范仲淹之謀畧司馬光蘇軾之忠直
文天祥之節義曰德曰功曰言表：著于史冊難
以殫述先生與諸公相後先穎悟警敏博極群書
居家以孝友見稱蒞官以忠義自許不為末世流
俗所搖奪醞藉甚富所得誠深矣寶祐元年朝廷
設科取士先生廷對萬餘言條荅疏暢深切時弊
登進士第一官授翰林職司敷文時元兵大起西

北多虞公嘗為烏：歌車攻賦勵志發憤折衝禦
侮值時相當權昏庸猥懦竟不能用遂使大志莫
酬可慨也已丙辰以病告歸繼罹憂制遂不起復
閑居以詩文自遣要其旨趣幽深玄遠溫雅和平
而其英邁之氣正大之情徃：見于言表其所抱
負雖不獲少試而經綸康濟之術亦自可見先生
之功與德與言可謂並茂矣舊遺叢稿一帙歲久
漸以敝訛愚恐格言至論將湮滅無傳重不仁孝

之罪也公般重加訂正期以傳之無窮庶乎公之
立言由茲不朽而其思見公之功德者一展卷如
在目中将不與呂王韓范司馬蘇文諸公後先媿
美矣乎謹因錄成而遂言之如此成化十七年龍
集庠寅賜進士出身戶部主事嗣孫樂宣頓首書



青磁山稿
23
20-
北京图书馆藏

